

16. maj 2015

UKA 2015/138

Inatsisartut suleriaasianni § 33 naapertorlugu Naalakkesuisut peqquneqarnissaannik Inatsisartut aalajangiiffissaatut siunnersuut matuma imaattoq saqqumiuppar.

**Kalaallit Nunaata Tunngaviusumik Inatsisissaanik suliaqartussamik isumalioqatigiissitamik kingusinnerpaamik 2016-ip naalernerani Naalakkersuisut pilersitseqqullugit peqquneqarnissaannik Inatsisartut Aalajangiiffigisassaattut siunnersuut.**

(Inatsisartunut ilaasortaq, Jens Immanuelsen Siumut)

**Tunngavilersuut:**

Namminersorneq pillugu inatsisikkut pisinnaatitaavugut qaqguluunniit naalagaaffinngussagutta nammineerluta tamanna suliarisinnaagipput.

Ukiuni 30-ini Namminersorneroreerluni nunarput Namminersulerpoq. Inuaqatigiillu namminiivikkusunnerannut takussutissaq ersarinnerpaaq tassaavoq Namminersulernissamut taasitsinermi inuaat piumassusermik takutitsinerat.

Ukiut arfinillit ingerlasimalereerput Namminersulerattali isumaqarpunga Tunngaviusumik Inatsisisamik piareersaasussanik Isumalioqatigiissitaliorqarnissaa siusinaarpallaangnitsoq, taamaattumik siunnersuutigaarput Naalakkersuisut Tunngaviusumik Inatsisiornissamut piareersaataasumik isumalioqatigiissitaliorqarnissaannik peqquneqassasut.

Isumaqarpunga Tunngaviusumik Inatsisitigut qulakteerneqassasut innuttaaqataanermi, Politikkikut, aningaasarsiornikkut, inooqataannikkut- kulturikkullu tunngaviusumik pisinnaatitaaffit. Soorlutaaq Tunngaviusumik Inatsisitigut aalajangersarneqassasoq innuttaasut ataasiakkaarlutik inuaqatigiinnut ataatsimoortunut akisussaaffiat, taamatuttaaq avatangiisitsinnut pinngortitarsuarmut kinguaassatsinnut ingerlateqqitassatsinnut.

Qulaani oqariartuutit aallaavigalugit isumaqarpunga suliassap aallartinneqarneratigut tamat oqartussaaqataanerat ilutigitillugulu inuaqatigiit sunnuteqaqataasinnaanerat peqataatinneqarnerallu nukitorsassagipput.

Aningaasatigut ingerlatsineq 2015 pillungu oqallinnermi Siumumiit oqaaseqarluta aallarniuteqarluta oqariartuutingaarput piffissanngortoq naalagaaffeqatigiiffimmi pisinnaatitaaffitta minnerungitsumik nunanut allanut tungatillugu maannakkornit anginerujussuusariaqarnerat.

Tamatumalu malitsigisaatut, maannakkut aalajangiiffigisassamik siunnersuuteqarpunga tunngaviusumik nunarput inatsiseqalissappat alloriarnissamut aqqutit suut atorneqartariaqarnersut qulaaja-

soqartariaqarmat, aamma isumaqarama uninngaannarata namminersornermiik ingerlaqqeriar-nissarput suliarilereertariaqaripput.

Sunut tamanut aningaasarsiornikkut ingerlatsinikkut Danmarkimut pituttungaanerput akikinerusumik ingerlatsisinnaanitsinnut noqtsisutut isigisarpara, akisuumillu ingerlatsinermik tamanna tunngaveqarluni. Soorlu taasinnaavara nunatsinni pisortani ingerlatsinikkut oqaatsit marluk atorlugit kalaallisut qallunaatullu ingerlatsineq akisoorujussuusoq, aammalu qallunaarpassuit pisortani sulisorineqarnerannut aqqutissiuussisuulluni allaat kalaallit ilinniarsimasut sulisorineqassanatik. Tamanna inuaqtigiinni kalaallini akuerineqarsinnaanngilluinnarpoq.

Nunarput inuviaat allat isaannit pingaarutilerujussuarmik inissisimavoq, aamma issittoq eqqarasatigalugu, minnerungitsumillu silaannaap allanngoriartornerata kingunerisaanik angallannikkut nunarput avaqqukkuminaalliartuinnarpoq, illersonissakkut nunat tamalaat akornanni nunarput pingaarutilerujussuartut inissisimavoq, tamatumalu nunatsinnut iluaqutaanerpaamik aaqqissuunnissaa angussagutsigu nammineerluta nunanut allanut isumaqtigiinniarsernaalertariaqarpugut isumaqtigiissuteqarsinnaalerlatalu.

Nunatta namminerisaminik tunngaviusumik inatsiseqalernissaanut tungavissavut naamattutut isigaakka pissutigalugu, piorsarsimassutsikkut tunngavigisavut naleqartitavullu qallunaanit (Dansklinik ) allaanerummata, aamma minnerungitsumillu inuviaat kalaallit maani saarngususaangatta, nunap inuvii aoqaasiilu aalaavigalugit atorlugillu sullissineq ingerlanneqartariaqalermat, tamatumani aamma kalaallisut oqaatsivut pingaarutilissuarmik inissisimasut ilanggullugit illorsorumallugit.

Inuviaat ( inuit )ukiorpassuarni nunarsuarmi angalareerlutik nunassaminnik nassaaramilli annaa-saqartarlutik allanillu akusarlutik inuuffigisimavaat ulloq manna tikillungu atugartuusuttikkut ineriartorfigalugu. Inuit- ullumikkut kalaallit nunassaminnileramik issitorsuarmi inuuffiguminaassinaasumi ukiorparujussuarni nugussimangillat, imminnut nappassinnaajumallutik avatagii-siminnut naleqqussartuarsimallutik. Imartamik nunagilikamillu pisuussutaat atorlungit inuuniarsimapput kinguaariinnit kinguaariinnut ingerlaqqittarsimapput allaat uagut ullumikkut nalerput tikillugu napallutik, naak inuuniarfingineqarsinnaasup killerpiaani inuuniarsimagaluarlutik nikallortitaasimagillat sineriassutsinni siammaseqisumi nunassittarsimapput inuuniutigisaminnut naleqqussarlutik, tassa oqaluttuarisaanermi tungavippot, tassa inuunerput.

Qallunaatsiaat nunatsinnut tikissimapput nunarpullu Grønland-mik atsigartik tiguarsimanngilaat pitsiaannarlu nungussimasorineqaput, taakku oqaluttuarisaanerat annerusumik eqqartussangilara.

Nunarput 1772-imi tillinneqarpoq nunasiaalerpungullu, nunap inuvisa pisuusutit piniarnermiik-kut pissarsiaat ilaannakortumik akilersorlungit tilligarpaat naalagaafiullu Danmark-ip tamassa ataannarneranut ullumikkutullu isikkoqarneranut ila nunarput qanoq angitigisumik akiliuteqar-

tinneqarsimasoruna? Ukiorpasuit ingerlaneranni Europamiut imartatsinni taamanersuaq arferniki piniapilunnerat, aalisangarpasvuarnik aalisapilunnerat ullumikkut uvagut ilaatigut killilersorneqaatigaarput. Eqqarsaruttami taamanersuaq piniapiluttoqarsimagitsuppat ilaa qanormita maannakkut annertutigisumik imartarsuarput pisuussuteqartigissagaluarpa Europamiut pisuussutitsinnik uumassusilinnik atornerluisimanngikkaluarpata. Aammalu pisuussutitsinnik uumaatsunik Danskit annertoqisumik piaanikuupput aningaasatigut qanoq iluanaarutaatigisimanerinin oqaatigineqarneq ajortunik, soorlu Ivittuuni orsugiassiorneq ingerlanneqarnikuovoq, sorsunnersuup kingulliup nalaani timmisartuliorernut nunarsuarmiunit atorluarneqaqisumik, kujataani kanngussamik piaanerit ingerlanneqartarsimapput, aamaruutissarsiornenit ingerlanneqartarsimapput aammalu maamorilimmi maamorimik kingusinnerusukkullu aatsitassanik piaanerit annertuumik ingerlanneqarsimallutik.

Imminut aperisarpunga Nunasiaataanerup nalaani kanngunartuliat qanormita amerlatigisut suli paasingilavut ukiunimi atukkatsinni isertuusiniarnerit oqinnerusumik aqqutissiuunneqarnerisa nalaanni paasisaqartarpugut nunarput nunasiaateqarnianit qanoq ajortigisumik pineqarsimanersoq atornerlunneqarsimanersoq.

Qaartartorsuarnik usisunik timmisartunik nunatta qulaavaaneqarnera ilami allaat miffigineqarsin-naalluni atorneqarnera qiviaannarutsigu, nunatta amerikkarmiunut sakkutooqarfittut Radareqarfittut atortinneqarnera, nunap inuviiut arlaannaatigulluniit iluaqsiigitsumik nunatta danskinit pilliutiginerqarnera akuerineqarsinnaanngilaq. Pituffimmi "Naalagarsuit" taamani taamatut taaneqartarnerattut akiliissanatik illoqartitaanerattut, allaat kalaallit immikkut isertarfekartitaallutik pineqarnerattut Pituffimmi ingerlatsineq akuerineqarsinnanngilaq. Ilami nunasiaanerup nalaani oqaluttuarisaanertut sinnattupalaatut ipporlusooq.

1953-imi naligiisitaalerpugunngooq aperiguttali kalaallit aalajageeqataagamik? ataasinnarmik nalunngisaqarpunga aalajangeeqataasimanngisaannarpugut - ajungilaq, nalingiisitaalerattangooq qallunaanngussaqaagut, tamatumali oqaluttuassartaa pitsauneruvalaanngilaq meeqqat aallartinneqartarput sumunnarfiannik oqaluttuunnagit, qanorlu pineqarnissaannik iluamik paasitinnagit, QALLUNAAT KALAALLILLU AKORNANNI akissarsiatigut assigiinngisitsisoqarpoq ulloq manna allaat tikillugu suli naapitassaasartumik, qujanartumik Politikkereqarpoq pissutnik eqeersimaarfiginnittunik, nunap inuinit illersuillutik sassaartaarsimasunik, ataaseq eqqaasin-naavarput, tassalu Elisabeth Johansen (Elisipanguaq) ersarilluartumik nalingiinngitsumik pinninnermut akuerininngitsoq nalingiisitaanermik eqqortumik ujartuisoq, allallu aamma nalimini Landsråd-mi suleqatai qutsavissaapput, sapiissuseqarlutik takutittarsimaneri pillugit.

Tamat oqartussaaqataanerat sakkut atornagit saqqummeriartuinnarpoq nunatta inuvisalu annerusumik piginnaatitaafeqartariaqarnerannik sorsuutiginnittut.

Inuusuttut eqeeriartulerput 1970-ip aallartinnerani soorlulusooq kaassassummik oqaluttuaaterput alliseequtigisaminik katatsiniarnermini ikiortissarsiorsimasoq politikkikkut sakkugineqarsinnaasut atorlugit alliseequtaasut piiarniarneqalerput, tamat oqartussaaqataanerat ajungaajartuinnarpoq ullan tamaasa annertusiartortumik, oqartussaafiup tigunissaanut inuviaat kalaallit qanilliartorput siammarsimallutik nunaqaraluarlutik ataatsimoornerat ima naggataani angusaqarfivoq namminersornerulerneq 1979-imi eqqunneqarluni, ukiut namminersornerulerneq nalaatavut politikkikkut inerikkartorfiulluarput nalagaaffeqatiginnermi ataqqeitatigiilluni oqartussaaffit tigujartuaarneqarput isumaqatigiiniarnerit aqqutigalungit, nunattalu namminersornerunerani angusaqarsimaqaagut. Ukiullu namminersorneruffivut periarfissanik nutaanik ammaassippu suli annerusumik alloriarfingineqarsinnaasunik, 2009-imilu namminersornerueq eqqunneqarpoq maannamut ukiut ikikkaluartut namminersornermit alloriarfissaq tulliuttoq piareersalereertariaqartoq isumaqarpunga. Sulimi Danmark-mit pissusilersorfigineqarnerput pitsaanerpaagitsoq paasivarput Pituffik pillungu suliaq qiviaannarutigu, kalaallit folketingimi ilaasortaatitaat immikkut paasitinneqassapput Danmak-imi ilaasortaasut paasitinneqareerpata, naak naligiimmik tungaviusumik inatsimmi naligikkaluartut pissusilersornerit taamatut ittut akuerengilakka toqqisisimanarinagillu, taamaatumik naalagaafingornissarput namminerlu tungaviusumik inatsiseqalernissarput suleqatigiisitaliorlugu aallartittariaqaleripput isumaqarpunga.

Apeqquigerusunneqarsinnaavoq sooq maannakkut aallartittariaqarnersugut, isumaqarpunga ornitatsinnut qanillereerluta periarfissarpasuavullu isigelereerlugin piffissaq atulussinnartaria-qanngikkippit, aperisoqartarpoq sooq namminersorneq-mit annerusoq tikinniarlugu tuaviortaria-qarnersugut, akisussaafiit pingaaruteqarluinnartut tamaasa nammineq ingerlattariaqalerpavut aamma aningaasatigut allanik isumalluusersorata ingerlasariaqalerluta, allamiunillu oqariartulernata nammineerluta nunanut allanut isumaqatigiissuteqarsinnaasariaqalerluta.

Ornitartput tikiffissarput isigelereerparput akisussaafiit pingaarutilissuit allanut isumagtitavut aningaasarpassuarnik pissarsissutigisinnaasavut suli isertuunniarneqartarput naak naligiinnermik tunngaveqarluni ingerlatsinissaq naalagaffimmii pingartinneqarluni nunarsuarmioqataasunut suaarutigineqartalaruertoq, suli arlalippassuartigut minnerutitaanerput misiguarparput nalaat-tuarlugulu.

Nammineq isumaliutersuutigaara naalagaaffingornissatinnut piareersaataasumik tungaviusumillu inatsiseqalernissarput anguniarlungu kommissioniliortariaqalersugut alloriarfissat suunerinik, aporfissat qanoq ililluni aaqqinniarneqarnissannik pisariaqartitallu suut amingaatiginerivut qulaaja-sussamik, aamma minnerungitsumillu nunat tamalaat akornanni suleqatigiiffissuup FN-ip isumaqatigiissutaasigut periarfissavut pillungit qulaajaasussamik.

Qulaani taakkartukkakka pillugit Kaassassummik oqaluttuami Kaassassuup alliseequtiminik piaaneratut annerusumillu piginnaatitaafeqalernissaminik ujartuineratut ingerlaqqittariaqarpugut, akiniaaneq pinnagu kulturerput oqaluttuarisaanerpullu sakkugalugit naalagaaffittut inissisimasutut

tungaviusumik inatsiseqalernissarput piffissangorsoraara, taalliortutta ilaat Henrik Lund taalliami ilaani ima oqariartuuteqarpoq ”silarput unigani ingerlagami malersorlugu pinianngitsuni nukillaarutaalerumaarpooq” puttaami sivisualaamik uninngassanngilagut piniaasaartugut aanguteqinammatigut, silaanaammi kissakkiartornera sakkortusiartuinnarpoq, silaannaallu allangoriartornera aamma periarfissanik nutaanik nunatsinnut ammaassisussaasoq nalungilarput, alloriaqqittariaqalerpugut.

**Pisortanut aningaasatigut allaffissornikkullu kinguneqaatit:** Soorunami Kommissionip qanoq suleriaaseqartinnissaa apeqquataassussaassaaq qanoq aningaasartuutissat annertussuseqarsinnaanisaannut, tamatumunngalu ilanngullugit innuttaasunik ataatsimiisitsisarnikkut peqataasitsineq, TV-kut paasissutissiisarnissat ilanngullugit. Aamma aningaasartuutissanut pingaaruteqassaaq kommissioni namminerisaminik allaffeqartinneqassanersoq, imaluunniit Naalakkersuisut siulittaasuata Naalakkersuisoqarfianiit allffissornikkut sullinneqassanersoq. Namminersorneq pillugu kommissionimut siullermut Kalaaliinnavinnik inuttalimmut taamani aningaasartuutit 16,3 mill. Kr. missaaniipput ukiunut sisamanut agguataakkat. Suut tamaasa naatsorsuutigalugit naatsorsuutigineqarsinnaavoq Tunngaviusumik Inatsimmik suleqartussaq kommissioni tamatuma missaani aningaasartuuteqarfiusinnaassasoq.

**Namminersorlutik inuussutissarsiortunut aningaasatigut allaffissornikkullu kinguneqaatit:**  
soqanngilaq

**Innuttaasunut kinguneqaatit:**

Soqanngilaq